



1913-yil aprel oyidan chiqib boshlagan

Fidoyilik —
Vatanga xizmat demak!

2024-yil 15-oktabr, seshanba,
119 (23.996)-son

Zarafshon

O'zbekiston
Respublikasi Oliy
Majlisi Qonunchilik
palatasi va xalq
deputatlari
Kengashlari
deputatlari
sayloviga
11 KUN
qoldi

www.zarnews.uz https://www.facebook.com/zarnews.uz @zarnews_uz https://twitter.com/zarnews_uz

MENING OVOZIM — MENING TANLOVIM!

16-oktabrdan muddatidan oldin ovoz berish boshlanadi



27-oktabr kuni o'tkaziladigan Oliy Majlis Qonunchilik palatasi va mahalliy Kengashlar deputatlari saylovi hal qiluvchi pallaga kirmoqda. Shu kunlarda siyosiy partiyalar, deputatlikka nomzodlar o'z saylovoldi tashviquoti tadbirlarini o'tkazmoqda. Joylarda saylovchilar bilan uchrashuvlar tashkil etilib, saylovoldi dasturi taqdimot qilinmoqda.

Saylov kodeksiga ko'ra, saylov kuni o'z yashash joyida bo'lish imkoniyatiga ega bo'lmagan saylovchi muddatidan oldin ovoz berish huquqiga ega.

Muddatidan oldin ovoz berish saylovga o'n kun qolganida boshlanadi va saylovga uch kun qolganida tugallanadi. Muddatidan oldin ovoz berishni o'tkazish vaqti Markaziy saylov komissiyasi tomonidan belgilanadi va saylovchilarning, kuzatuvchilarning e'tiboriga ommaviy axborot vositalari orqali yetkaziladi.

Markaziy saylov komissiyasining joriy yil 8-oktabr kuni bo'lib o'tgan navbatdagi majlisida saylovchilarning muddatidan oldin ovoz berishlarini tashkil qilish masalasi ko'rib chiqilib, qaror qabul qilindi. Unga ko'ra, saylov kuni o'z yashash joyida bo'lish imkoniyatiga ega bo'lmagan saylovchilar 2024-yil 16-23-oktabr kunlari soat 9:00 dan 18:00 ga qadar, dam olish kunlari esa soat 11:00 dan 17:00 ga qadar o'z hududlaridagi saylov uchastkasiga borib, muddatidan oldin ovoz berishlari mumkin.

Muddatidan oldin ovoz berishni amalga oshirish uchun saylovchi saylov kunida bo'la olmasligining sabablari (ta'til, xizmat safari, xorijga chiqish va hokazo) ko'rsatilgan ariza asosida tegishli uchastka saylov komissiyasidan saylov byulletenlarini oladi. Saylovchi saylov byulletenlarini olganligi haqida tegishli uchastka saylov komissiyasining kamida ikki nafar a'zosi hozirigida saylovchilar ro'yxatiga imzo qo'yadi.

Saylov byulletenlari maxsus jihozlangan yashirin ovoz berish kabinasida yoki xonasida saylovchi tomonidan to'ldiriladi.

Saylovchi qaror qabul qiladi va to'ldirilgan saylov byulletenlarini yopiq konvertida qoldiradi, konvert tegishli uchastka saylov komissiyasining seyfidan saqlanadi. Konvertning yelimgan joyiga uchastka saylov komissiyasining ikki nafar a'zosi qabul qiladi, ular komissiyaning muhri bilan tasdiqlanadi.

Saylov kuni ovoz berish yakunlanganidan so'ng ushbu konvertlar ichidagi byulletenlar ham saylov qutisiga tashlanib, so'ngra ovozlar sanab chiqiladi.

Hozirda viloyatimizdagi barcha saylov uchastkalari-ga muddatidan oldin ovoz berishni o'tkazish uchun saylovchilar umumiy sonining 10 foizi miqdorida saylov byulletenlari yetkazib berilgan.

Amrillo AKTAMOV,
viloyat hududiy saylov komissiyasi kotibi.



Saylov kuniga qadar yoki saylov kuni o'n sakkiz yoshga to'lgan, ro'yxat tuzilayotgan paytda mazkur saylov uchastkasi hududida doimiy yoki vaqtincha istiqomat qilayotgan fuqarolar saylovchilar ro'yxatiga kiritiladi.

Har bir saylovchi faqat bitta saylovchilar ro'yxatiga kiritilishi mumkin.

Saylovchilarning ro'yxatlari saylovga o'n besh kun qolganida, O'zbekiston Respublikasining chet davlatlardagi diplomatik va boshqa vakolatxonalarida, sanatoriylarda va dam olish uylarida, kasalxonalarda va boshqa stasionar davolash muassasalarida, o'lis va borish qiyin bo'lgan hududlardagi fuqarolar turgan joylarda, qamoqda saqlash va ozodlikdan mahrum etish joylarida tuzilgan uchastkalarda esa saylovga uch kun qolganida hamma tanishib chiqishi uchun taqdim etiladi.

Saylov kodeksi 27-moddasidan.



27-oktabr kuni bo'lib o'tadigan Oliy Majlis Qonunchilik palatasi va xalq deputatlari viloyat, tuman, shahar Kengashlari deputatlari saylovini yuqori saviyada o'tkazishga viloyatimizda ham puxta hozirlik ko'rilmogda. Bugungi kunda viloyatda saylovni o'tkazish uchun 1130 ta saylov uchastkasi tuzilgan.

Past Darg'om tumanidagi 755-saylov uchastkasi 56-umumta'lim maktabi binosida faoliyat yuritmoqda. Saylov kuni bu yerda Nayman va Mirzato'p mahallalarining 2 ming 989 nafar fuqarosi ovoz beradi. Ularning 67 nafari saylovlarda ilk marta ishtirok etayotgan yoshlardir.

Saylovni yuksak saviyada o'tkazish uchun uchastkada zarur shart-sharoit yaratildi, — deydi uchastka saylov komissiyasi raisi Shahlo Saidmurodova. — Saylovchilar uchastkada saylovga oid qonunlar, kundalik matbuot nashrlari bilan tanishib, o'zlarini qiziqtirgan savollarga javob olishlari mumkin. 16-oktabrdan yurtimizda muddatidan oldin ovoz berish jarayonlari boshlanadi. Hozirda uchastkada ushbu tadbirga hozirlik ko'rilmogda.

Baxtiyor MUSTANOV.

To'g'ri yo'ldan boraylik!

Kambag'allikdan farovonlik sari

Yangi harakat boshlandi. Kambag'al oilalar hayotini o'zgartirish, turmush tarzini yaxshilash uchun "Kambag'allikdan farovonlik sari" dasturi amalga oshirilishi belgilandi. Davlat rahbari yig'ilish o'tkazib, bu tizim qanday ishlashi, kambag'al oilalar bilan ishlashda nimalarga e'tibor qaratish kerakligini aytdi. Ha, shu ishga mas'ul vazir yoki boshqa rahbar emas, aynan Prezident tushuntirdi, mas'ullarning qulog'iga quyib qo'ydi. Har bir rahbarga beshtadan kambag'al oila birkittiriladigan bo'ldi.

Rahbarlar yig'ilishning ertasigayoq o'z hududidagi kambag'al oilalarga kirdi, xonadonda yashovchilar bilan suhbatlashdi, ularning nima muammosi borligi, qanday yordam ko'rsatish kerakligi aniqlashtirib olindi. Va bu haqda ijtimoiy tarmoqlarda suratlar, videolavhalar paydo bo'ldi. Ko'ngillarda umid uyg'ondi — bu gal rahbarlar masalaga jiddiy kirishdi, demak, tez orada o'zgarishlar ko'zga tashlanadi.

Ko'p joyda amaliy ishlar ham boshlandi. Bundan xursand bo'lish kerak!

23-sentabr kuni davlat rahbari "Kambag'allikdan farovonlik sari" dasturini amalga oshirishga doir farmon va qaror qabul qildi. Bu hujjatlarda ham vazifalar, chora-tadbirlar aniq belgilandi, nochor oilalarni kambag'allikdan chiqarish tartibidan boshlab, bu qanday tarzda amalga oshirilishiga-

cha qayd etib qo'yildi. Ammo...

Ayrim "haybarakallachi" mas'ullarning xatti-harakati, odamlar hayotini emas, raqamlarni o'zgartirishga intilishi ortidan "ammo"lar yuzaga kelmoqda.

Viloyatimiz tumanlaridan birida bu borada olib borilayotgan ishlar haqida ma'lumot so'radik. Bir necha kun qayta-qayta so'raganimizdan keyin taqdim etilgan ma'lumotda keltirilishicha, yil yakunigacha tumanda kambag'allikni ikki barobarga qisqartirish belgilanibdi. Qanday yaxshi-ya. Ammo qaysi yo'l bilan, qanday manbalar hisobidan, nimaning evaziga, degan savollarimizga haligacha javob yo'q.

Ko'p joyda subsidiya asosida tikuv mashinasi, pishiriq pishirish pechi, motokultivator va yana shu kabi ishlatib, daromad topish mumkin bo'lgan vosi-

talar berilmogda. To'g'ri, bu vositalardan samarali foydalanilgan turmushi biroz bo'lsa-da, o'zgaryapti, daromad topyapti. Lekin shu "yordam"ning o'zi bilan qog'ozda chiqsa ham amalda kambag'allikdan chiqmayotgan oilalar kam emas-da.

Yana bir ma'lumotga ko'zim tushdi. Tumandagi banklardan birining rahbari o'ziga birkittirilgan kambag'al oilaning ishsiz a'zosiga 30 million so'm imtiyozli kredit ajratib, motokultivator olib beribdi. Uni shu yo'l bilan kambag'allikdan chiqarmoqchi ekan. Aytinch, ishsiz fuqaro bu vositani ishlatib, bola-chaqa boqsinmi yoki kredit to'lasinmi? O'zi bitta motokultivator qancha turadi?

O'zi va xodimlari ikki oydan buyon maosh olmayotgan bir tashkilot rahbariga ham beshta kambag'al oila birkittirilganini eshitib, kulishni ham yig'lashni ham bilmadim. Axir uning o'zi yordamga muhtoj-ku!

Xullas, Prezident boshlagan bu xayrli ishga xo'jako'rsing deb, raqamlar uchungina bosh qo'shmaslik kerak. Kambag'allikdan farovonlik sari to'g'ri yo'ldan boraylik, odamlarning hayoti yaxshi tomonga o'zgarsin, kambag'al oilalarga yorug'lik, baraka kirsin, deb zimmamizdagi vazifalarni bajaraylik.

G'olib HASANOV.

Har bir tumanda kamida mingta ish o'rniga ega sanoat zonalari bo'ladi



Nomzodlar qo'shrabotlik saylovchilar bilan uchrashdi



Samarqand davlat universiteti qoshidagi akademik litseyda xalq deputatlari viloyat kengashiga saylov o'tkazuvchi 2-Afrosiyob saylov okruginan nomzod Erkinjon Turdimovning ishonchli vakili Shexroz Abbosov saylovchilar bilan uchrashdi.

Uchrashuvda O'zbekiston Liberal-demokratik partiyasi viloyat kengashi raisi Ilhom Botirov so'zga chiqib, partiyaning 5 maqsad, 500 vazifani o'z ichiga qamrab olgan xalqchil saylovoldi dasturi to'g'risida ma'lumot berdi.

Saylovlarda siyosiy partiyalarning eng muhim hujjati — bu ularning saylovoldi dasturi hisoblanadi, — dedi Sh.Abbosov. — Chunki dasturda partiyalarning kelgusi besh yillik faoliyati yo'nalishlari, asosiy maqsad-vazifalari o'z aksini topadi.

Jumladan, partiyamizning saylovoldi dasturida avvalo, "O'zbekiston-2030" strategiyasidan kelib chiqqan holda inson qadr-qimmatini, erkinligi, huquq va manfaatlarini, farovon yashashi kabi masalalarga ustuvor ahamiyat qaratilgan.

Mamlakat iqtisodiyoti mustahkam va baquvvat bo'lsa, unda yashayotgan insonlar farovon yashaydi. Shundan kelib chiqib, partiyamiz dasturidan iqtisodiy islohotlarning muhim yo'nalishlari, sohaning qonunchilik asoslarini mustahkamlashga qaratilgan maqsad-vazifalar o'rin olgan.

Shuningdek, dasturimizda har bir tumanda kamida mingta ish o'rni yaratadigan ikkita yangi sanoat zonalarini tashkil qilish va har bir hududda kasbga o'rgatish monomarkazlari faoliyatini yo'lga qo'yish maqsad qilingan.

O'zLiDeP viloyat kengashi axborot xizmati.

Saylovoldi tashviquoti partiya hamda nomzodlarning g'oya va dasturlarini saylovchilarga yetkazishda muhim ahamiyat kasb etadigan demokratik jarayonning ajralmas qismi hisoblanadi. Shu bois yurtimizdagi boshqa siyosiy partiyalar qatori "Milliy tiklanish" demokratik partiyasi va partiyadan parlament hamda mahalliy Kengashlar deputatligiga ko'rsatilgan nomzodlar ham bu jarayonda faol ishtirok etmoqda.

Oliy Majlis Qonunchilik palatasi deputatligiga 30-Samarqand saylov okruginan nomzod Bekmirza Eshmirzayev hamda xalq deputatlari viloyat Kengashi deputatligiga 22-Jo'sh saylov okruginan nomzod Sa'dulla Absamatov Qo'shrabot tumanidagi Toz, Sorg'ul, Urganji, Jonbuloq mahallalarida saylovchilar bilan uchrashuv o'tkazdi.

Tadbirlarda deputatlikka nomzodlar partiyaning 2025-2029-yillarga mo'ljallangan saylovoldi dasturida belgilangan ustuvor vazifalarga to'xtaldi. Partiya dasturidagi har bitta yo'nalish va ularning mamlakatimiz taraqqiyoti, xalqimiz turmush farovonligini oshirishdagi ahamiyatini saylovchilarga tushuntirdilar.

Ochiq muloqotlarda nomzodlar saylovchilarni qiynab kelayotgan masalalarni ham o'rgandi. Mavjud muammolarning yechimi bo'yicha fikr-mulohazalar bildirilib, aholi tomonidan berilgan savollarga atroflicha javob berildi.

Uchrashuvlar yakunida nomzodlar saylovchilarni 27-oktabr kuni "Milliy tiklanish" demokratik partiyasi va partiyadan ko'rsatilgan nomzodlarni qo'llab-quvvatlashga chaqirdilar.

O'zMTDP viloyat kengashi axborot xizmati.



Akademik eshkak eshish bo'yicha Osiyo chempionatida 12 ta medalni qo'lga kiritdik

10-13-oktabr kunlari Samarqandda akademik eshkak eshish bo'yicha Osiyo chempionati bo'lib o'tdi.

13 mamlakatdan 250 nafar sportchi ishtirok etgan qit'a birinchiligi-da 9 dasturda 2 kilometr masofaga poygalar tashkil etildi.

Musobaqa natijasiga ko'ra, vakillarimiz umumjamoa hisobida 5 ta oltin, 4 ta kumush va 3 ta bronza medali bilan Xitoydan so'ng ikkinchi o'rinni egalladi.

